

○丁丑諭內閣。本日據裕秦等由六百里馳奏。收復崇陽縣城。生擒首要各犯一摺。覽奏欣慰之至。湖北崇陽縣逆匪鍾人杰。本係在逃徒犯。膽敢聚眾戕官。連陷崇陽通城。設立鍾勤王偽號。並豎立都督大元帥紅旗。分設知縣千總偽職。遣令匪黨攻撲附近城邑。罪大惡極。覆載不容。經總督裕秦馳往咸寧。就近調撥官兵。分守要隘。賊匪攻犯通山蒲圻。均經官兵擊斃。嗣提督劉允孝帶兵會勦。調集官弁。分兵五道。同時並進。昨據報到。連奪賊卡。已降旨將裕秦劉允孝。交部議敘。本日據奏。大兵將次進攻。先遣前署咸寧縣知縣夏廷樾。前署崇陽縣知縣金雲門。懸賞招覓士民。羈縻首要各犯。劉允孝亦募紳民嚮導。內應自石盤山進攻。夏廷樾會同遊擊謝正國。在黑橋接仗。陣殲賊匪三百餘名。追殺一百餘名。距賊巢白蟻橋五里地方。又殺賊五十餘名。該邑紳士。乘機誘令首逆出城。經官兵義勇趕至。合圍立將首犯鍾人杰。及要犯陳寶銘。汪敦族。一併生擒。

該督即由洪上地方前進。收復崇陽縣城。安撫居民。分兵前往通城。接應收復等語。逆匪於上年十二月十二日。據城戕官。建立偽號。經該督等調兵防勦。謀勇兼施。在事文武官員。弁兵紳民。均能同心協力。迅掃欃槍。甫及四旬。收復崇陽縣城。生擒首要各犯。辦理迅速。甚屬可嘉。裕泰前已賞戴花翎。著加恩賞加太子太保銜。並賞換雙眼花翎。劉允孝亦著加恩賞換雙眼花翎。發去花翎二枝。交裕泰。劉允孝。祇領在事文武各員。弁。並嚮導內。應羈縻誘令之紳士民人。及出力各義勇。均著據實保奏。候朕施恩。據奏該督行營經過地方。紳民焚香跪道。帶兵各員。均能不妄殺戮。現在地方救謐。朕心甚慰。所有留撤官兵。及善後事宜。均著裕泰妥籌具奏。逆匪鍾人杰。陳寶銘。汪敦族。著即遴委妥員。檻送京師。盡法處治。以伸國憲而快人心。將此通諭中外知之。